



# RM1.5K TAK JUAL

*Basikal tua berusia 100 tahun sarat dengan nilai sentimental*

Oleh Ahmad Hasbi  
am@hmetro.com.my

## Kuala Pilah

**S**epeda karat milik Lans Koperal Mohd Shanusi Saari, 35, bukan calang-calang sebaliknya basikal tua berusia lebih 100 tahun ini penuh dengan nilai sentimental, malah pernah cuba dicuri daripada pemilik asal.

"Sekali pandang ia tidak ubah umpama besi buruk yang sudah berkarat. Namun, 'besi buruk' ini boleh mencecah harga ribuan ringgit di pasaran jika mahu dijual," katanya ditemui.

Menurut Mohd Shanusi, basikal berkenaan pada asalnya milik seorang wanita dikenali sebagai Ruhil, 75, dari Kampung Kubang Rusa di sini.

Katanya, walaupun kini miliknya, dia turut diamanah-

kan oleh Ruhil supaya menjaga basikal tua itu selepas ia cuba dicuri daripada rumah wanita itu tiga tahun lalu.

"Saya mengenali mak cik Ruhil kerana sering meronda di kawasan rumahnya. Kerana minat terhadap barang lama, saya cuba membeli basikal berkenaan daripadanya namun tiga kali dia menolak.

"Mak cik Ruhil sangat sayangkan basikal itu kerana ia satu-satunya barang peninggalan arwah bapanya. Difahamkan, basikal itu digunakan arwah bapanya untuk pergi bekerja ketika masih muda dan dianggarkan usianya

sudah melebihi 100 tahun.

"Namun, satu hari, mak cik Ruhil menghubungi saya memaklumkan basikal berkenaan cuba dicuri seseorang kerana ia sudah diseret sehingga ke pintu pagar namun tidak berjaya dilarikan," katanya.

Mohd Shanusi berkata, Ruhil kemudian menjual basikal itu kepadanya walaupun berat hati kerana tidak mahu ia terlepas ke tangan orang yang tidak pandai untuk menghargai nilainya.

"Saya membelinya pada harga RM300 dan diamankan supaya menjaganya dengan baik. Ketika itu, ba-

sikal ini tidak dapat bergerak kerana berkarat selain tayarnya sudah rosak.

"Saya kemudian membaik pulih basikal ini sebelum ia dapat digunakan. Jika ada masa, saya akan melawat mak cik Ruhil dan membawa basikal itu untuk dia melepaskan rindu," katanya yang menyertai Persatuan Basikal Tua Negeri Sembilan.

Mohd Shanusi berkata, dia tidak mengecat semula basikal itu dan membiarkan ia dalam keadaan berkarat kerana menganggap cat asli dan karat berkenaan ada sesuatu yang sukar ditemui.

"Ia mengambil masa kira-kira 100 tahun untuk mendapatkan karat seperti ini. Walaupun berkarat, struktur badannya masih kukuh dan sebab itu juga saya pernah ditawarkan seorang individu untuk membeli basikal ini pada harga RM1,500," katanya.

